

Tarikh Dibaca: 25 Julai 2025M | 29 Muharram 1447H



KHUTBAH JUMAAT

Tajuk:

“PAHLAWAN SEJATI”

Terbitan:

Unit Khutbah

Bahagian Pengurusan Masjid

JABATAN AGAMA ISLAM SELANGOR

“PAHLAWAN SEJATI”

الْحَمْدُ لِلَّهِ الْقَائِلِ : فَلَا تَهِنُوا وَتَدْعُوا إِلَى السَّلَامِ وَأَنْتُمْ الْأَعْلَوْنَ
وَاللَّهُ مَعَكُمْ وَلَنْ يَتْرُكُمُ أَعْمَلَكُمْ.¹

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا
عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ
وَصَحْبِهِ أَجْمَعِينَ.

أَمَّا بَعْدُ، فَيَا أَيُّهَا الْمُسْلِمُونَ اتَّقُوا اللَّهَ، أَوْصِيكُمْ وَإِيَّايَ بِتَقْوَى
اللَّهِ فَقَدْ فَازَ الْمُتَّقُونَ.

قَالَ اللَّهُ تَعَالَى : يَأَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا
تَمُوتُنَّ إِلَّا وَأَنْتُمْ مُسْلِمُونَ.²

Muslimin yang dirahmati Allah SWT sekalian,

Saya menyeru agar kita bersama-sama meningkatkan ketaqwaan kita kepada Allah SWT dengan melaksanakan segala perintah dan meninggalkan segala perkara yang dilarang-Nya. Semoga kita semua diberikan kebahagiaan dan kejayaan di dunia dan di akhirat.

¹ Muhammad: 35.

² Ali-Imran: 102.

Pada hari yang mulia ini mimbar akan membicarakan khutbah bertajuk **"PAHLAWAN SEJATI"**.

Hadirin Jumaat yang dirahmati Allah SWT,

Alhamdulillah, di negara kita yang telah sekian lama merdeka, kita dapat menikmati kedaulatan dan kebebasan serta keupayaan mengurus negara sendiri tanpa campur tangan asing. Penderitaan akibat paksaan dan penindasan yang pernah dirasakan oleh para pahlawan kemerdekaan dahulu, tidak lagi kita tanggung hari ini.

Berkat kemerdekaan yang kita kecapai hari ini, kita dapat menjalani rutin harian dengan aman dan selesa. Kita bebas beribadah kepada Allah SWT dengan tenang, khusyuk, tanpa sebarang ancaman dan gangguan. Cuba bayangkan nasib saudara-saudara kita yang berada di negara yang dijarah, dihipit dan disiksa jiwa dan raga. Sehingga kini mereka hidup dalam keadaan ketakutan, hampir setiap saat dibayangi kelaparan, penyiksaan dan kematian akibat sekatan mahupun serangan letupan. Dalam keadaan begitu, tentu sukar untuk mereka mencapai makna sebuah kehidupan, apatah lagi untuk beroleh kebebasan dalam menjalani kehidupan seharian dan jauh sekali beroleh ketenangan dalam beribadah kepada Allah SWT. Maka, nikmat kedaulatan dan kebebasan ini wajib kita syukuri dan manfaatkan sebaik-baiknya, kerana ia bukan sesuatu yang kekal. Jika kita lalai, ia boleh sahaja hilang sekelip mata, sebagaimana runtuhnya tamadun-tamadun agung Islam yang lampau.

Keadaan yang sedang dialami oleh saudara-saudara kita di negara yang dijarah dan ditindas pada hari ini, hakikatnya pernah juga dirasakan oleh rakyat, para pejuang dan pahlawan tanah air kita suatu ketika dahulu. Waktu itu, suasana berhadapan dengan musuh telah menggugat kebebasan dan ketenangan hidup rakyat tanah air ini. Para pejuang dan perajuritlah yang bergerak di barisan hadapan mengangkat senjata dan menggadaikan nyawa mereka semata-mata untuk memastikan negara ini terus berdaulat dan mengecap keamanan. Maka, kita perlu sedar, insaf dan bersyukur atas segala nikmat anugerah Allah SWT yang disampaikan melalui pengorbanan tulus para pahlawan kita.

Firman Allah SWT dalam surah Ibrahim ayat 7:

وَإِذْ تَأَذَّنَ رَبُّكُمْ لَئِنْ شَكَرْتُمْ لَأَزِيدَنَّكُمْ وَلَئِنْ كَفَرْتُمْ إِنَّ عَذَابِي
لَشَدِيدٌ.

"Dan (ingatlah) ketika Tuhanmu memberitahu, "sesungguhnya jika kamu bersyukur, Kami pasti akan menambah (nikmat) kepadamu dan jika kamu mengingkari (nikmat-Ku) maka, sesungguhnya azab-Ku sangat pedih."

Hadirin Jumaat yang dirahmati Allah SWT,

Setiap tahun, kita memperingati Hari Pahlawan sebagai tanda penghargaan dan penghormatan terhadap jasa para pejuang tanah air kita. Ia menjadi satu episod bersejarah yang wajar terus diingati oleh seluruh rakyat Malaysia, agar sentiasa menghargai pengorbanan para pahlawan yang telah mempertaruhkan jiwa dan raga demi mempertahankan kedaulatan negara ini.

Kita menghargai jasa para tentera, polis dan agensi keselamatan lain yang sentiasa berada di barisan hadapan. Mereka sanggup mengorbankan jiwa dan raga, meninggalkan keluarga tercinta serta berkawal di sempadan tanah air demi memastikan setiap warganegara dapat mengecapi nikmat keselamatan dan keamanan daripada sebarang ancaman, sama ada dari luar mahupun dari dalam negara.

Sudah tentu sebagai warganegara, kita perlu berusaha dan berganding bahu untuk terus mengekalkan keamanan yang dirintis oleh para pejuang dan pahlawan terdahulu. Justeru, semangat kepahlawanan ini perlu wujud dan sehati dalam sanubari setiap umat Islam dengan menjadi kelompok yang memelihara keamanan, membina kekuatan dengan kesatuan akidah, bukannya menjadi duri dalam daging mahupun gunting dalam lipatan.

Hakikatnya, mereka yang turut serta menjaga keamanan negara ialah insan yang benar-benar mencintai tanah airnya. Dengan rasa cinta itu, lahirlah kekuatan untuk berbakti dan berkorban demi negara. Namun, kekuatan yang dimaksudkan bukan sekadar kekuatan fizikal atau kecerdasan ilmu semata-mata. Sebagai umat Islam, kekuatan yang paling utama adalah kekuatan iman dan keyakinan kepada Allah SWT. Itulah pasak kukuh yang menjadi asas kehidupan, menjadikan seorang Muslim itu tegas dalam prinsipnya, bijaksana dalam tindakannya, dan tidak mudah goyah di hadapan musuhnya.

Hadis yang diriwayatkan daripada Abu Hurairah *Radiallahuanhu* bahawa Rasulullah SAW bersabda:

المُؤْمِنُ الْقَوِيُّ خَيْرٌ وَأَحَبُّ إِلَى اللَّهِ مِنَ الْمُؤْمِنِ الضَّعِيفِ

“Mukmin yang kuat lebih baik dan dicintai Allah berbanding Mukmin yang lemah.”

(Riwayat Muslim).

Sidang Jumaat yang dikasihi Allah SWT,

Sesungguhnya keberanian seseorang pahlawan itu hanya lahir daripada jiwa yang kuat yakni jiwa yang tidak tunduk pada rasa lemah atau rasa takut. Ketakutan dan pengharapannya hanya disandarkan kepada Allah SWT. Orang berani bukan kerana dia tidak pernah merasa takut, tapi dia tidak menjadikan ketakutan itu sebagai alasan untuk lari daripada tanggungjawab. Jika kita ingin melihat contoh terbaik dalam hal ini, lihatlah kepada Rasulullah SAW. Baginda SAW adalah insan paling berani. Dalam banyak pertempuran penting, para pemimpin kuffar dan tentera musuh lari daripada menghadapi Baginda SAW. Dalam masa yang sama, Baginda SAW sendiri sentiasa berada di barisan hadapan. Inilah keberanian yang sebenar, keberanian yang lahir daripada keyakinan yang mendalam serta kefahaman terhadap makna dan tujuan kehidupan Baginda SAW.

Anas bin Malik *Radiallahuanhu* katanya:

“Adapun Nabi SAW adalah manusia yang paling baik dan berani. Sesungguhnya pada suatu malam penduduk Madinah terkejut (dengan bunyi yang kuat). Maka mereka keluar untuk mengetahui bunyi tersebut. Lalu mereka bertemu Rasulullah SAW yang sedang pulang dan telah mendahului mereka semua dari arah datangnya bunyi tersebut. Baginda SAW menunggang kuda Abu Talhah dan pedang Baginda SAW digantung pada leher kuda tersebut lalu bersabda:

لَمْ تُرَاعُوا، لَمْ تُرَاعُوا

“Kalian jangan takut, kalian jangan takut”.

(Riwayat al-Bukhari dan Muslim).

Kejadian ini membuktikan betapa beraninya Rasulullah SAW kerana Baginda SAW sendiri keluar lebih awal daripada para sahabat, menyiasat apa yang berlaku, lalu menenangkan hati mereka.

Hadirin Jumaat yang dirahmati Allah SWT,

Mengimbau sejarah tanah air kita, ramai ikon agama menjadi pahlawan yang bangkit mempertahankan maruah bangsa, agama dan negara ini. Antara nama yang terbukti memainkan peranannya yang tersendiri bersama pahlawan-pahlawan lainnya adalah Tok Janggut dan Mat Kilau.

Tok Janggut, seorang alim yang berasal dari Kelantan, pernah merantau menuntut ilmu di Mekah, beliau bangkit menentang penjajahan British apabila dasar yang dikenakan ke atas rakyat bersikap berat sebelah, diikuti dengan pelantikan pegawai luar yang langsung tidak mempedulikan maruah dan sensitiviti masyarakat tempatan. Beliau bersama rakan-rakannya yang lain bangkit dengan semangat jihad menentang penjajahan British sehingga berjaya menguasai daerah Pasir Putih buat seketika, sebelum syahid di medan pertempuran.

Begitu juga dengan Mat Kilau, seorang pahlawan yang berasal dari Pahang. Beliau bersama ayahandanya, Tok Gajah, serta sahabatnya Dato' Bahaman, pernah memimpin gerakan gerila menentang penjajah pada tahun 1891 hingga 1895. Dalam tempoh tersebut, mereka bergerak dari hutan ke hutan, meninggalkan keluarga, menempuh keperitan semata-mata untuk mempertahankan hak tanah air daripada terus dijajah dan diinjak pihak British.

Juga jangan dilupakan peristiwa berdarah di Bukit Kepong pada tahun 1950, saat pasukan polis mempertahankan balai mereka daripada serangan gerila komunis. Dalam serangan subuh yang kejam pada waktu itu, anggota polis yang bertugas tidak gentar menghadapi kepungan dan serangan bertubi-tubi musuh sehingga ke titisan darah terakhir.

Inilah contoh pahlawan sejati. Mereka bukan sekadar mempertahankan tanah air, tetapi mereka membawa misi membela agama dan bangsa yang merupakan suatu kewajipan.

Hadirin Jumaat yang berbahagia,

Mengambil semangat para pejuang terdahulu, marilah kita semarakkan obor perjuangan yang kian malap dalam jiwa umat Islam hari ini. Bukan dengan senjata dan kekerasan, tetapi dengan keyakinan terhadap Islam sebagai cara hidup dan tanggungjawab melaksanakan amar makruf nahi mungkar.

Jangan kita gunakan kekuatan dan keberanian itu untuk menindas golongan yang lemah, menyebarkan kebencian, dendam, hasad dengki dan khianat. Sebaliknya, salurkanlah kekuatan dalam mempertahankan maruah Islam dan umatnya, di samping menegakkan keadilan serta menjauhi sebarang bentuk kezaliman terhadap orang lain.

Contohnya Rasulullah SAW. Walaupun mempunyai kekuatan dan keberanian yang luar biasa, namun kekuatan itu tidak digunakan untuk menzalimi atau menindas sesiapa.

Saidatina Aisyah *Radiallahuanha* pernah menyebutkan bahawa:

"Rasulullah SAW tidak pernah memukul sesiapa pun dengan tangannya, sama ada wanita mahupun khadam, melainkan ketika berjihad di jalan Allah. Baginda tidak pernah membalas perbuatan orang di sekelilingnya melainkan jika larangan Allah dicabuli, balasan Baginda itu adalah semata-mata demi Allah."

(Riwayat Muslim).

Maka sebagai umat Islam, kita juga perlu mencontohi keberanian Rasulullah SAW dengan menghayati sirah perjuangan Baginda SAW. Bukan semata-mata dalam medan perang, tetapi juga dalam medan kehidupan seharian. Kita mesti berani menegakkan kebenaran, menolak kezaliman, dan melakukan islah dengan penuh hikmah.

Sidang jemaah yang dirahmati Allah SWT,

Mengakhiri khutbah pada hari ini, marilah kita mengambil beberapa pengajaran berikut untuk dijadikan sebagai pedoman hidup kita:

1. Umat Islam hendaklah menginsafi bahawa kedaulatan dan kebebasan negara hanya akan kekal terpelihara selagi mana rakyatnya berpegang teguh kepada iman, taqwa dan petunjuk Allah SWT.
2. Umat Islam hendaklah menjauhkan diri daripada sifat pengecut dalam menyuarakan kebenaran dan lari daripada tanggungjawab, serta menghindari segala bentuk pengkhianatan yang boleh menggugat keselamatan dan menjejaskan keamanan negara.
3. Umat Islam hendaklah sentiasa ingat bahawa Allah SWT sentiasa bersama-sama hamba-Nya yang beriman dan bertakwa.

أَعُوذُ بِاللَّهِ مِنَ الشَّيْطَانِ الرَّجِيمِ
إِنَّ اللَّهَ مَعَ الَّذِينَ اتَّقَوْا وَالَّذِينَ هُمْ مُحْسِنُونَ.

"Sesungguhnya Allah bersama-sama orang yang bertakwa dan orang yang berbuat kebaikan."

(Surah An-Nahl: 128).

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ
مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ
السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ
الْمُسْلِمِينَ وَالْمُسْلِمَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ الطَّيِّبَاتِ.
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا
عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ
وَعَلَى آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ. أَمَّا
بَعْدُ، فَيَا عِبَادَ اللَّهِ اتَّقُوا اللَّهَ أَوْصِيَكُمْ وَإِيَّايَ بِتَقْوَى اللَّهِ فَقَدْ
فَازَ الْمُتَّقُونَ.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا
عَلَيْهِ وَسَلِّمُوا تَسْلِيمًا.³

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ
أَجْمَعِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ
الْأَحْيَاءِ مِنْهُمْ وَالْأَمْوَاتِ، إِنَّكَ سَمِيعٌ قَرِيبٌ مُجِيبُ الدَّعَوَاتِ
وَيَا قَاضِيَ الْحَاجَاتِ.

³ Al-Ahzab: 56.

اللَّهُمَّ أَصْلِحْ أُمَّةَ الْمُسْلِمِينَ وَوَلَاةَ أُمُورِهِمْ وَجَمِيعَ الْمُسْلِمِينَ.
اللَّهُمَّ إِنَّا نَسْأَلُكَ وَنَتَوَسَّلُ إِلَيْكَ بِنَبِيِّكَ الْأَمِينِ، وَنَسْأَلُكَ
بِأَسْمَائِكَ الْحُسْنَى، وَصِفَاتِكَ الْعُظْمَى، أَنْ تَحْفَظَ بَعِيْنَ
عِنَايَتِكَ الرَّبَّانِيَّةَ، وَبِحِفْظِ وَقَايَتِكَ الصِّمْدَانِيَّةَ، جَلَالَةَ مَلِكِنَا
الْمُعَظَّمِ، سُلْطَانَ سَلَاطُور، سُلْطَانَ شَرَفُ الدِّينِ اَدْرِيسِ شَاهِ
الْحَاجِ ابْنِ الْمَرْحُومِ سُلْطَانَ صَلَاحُ الدِّينِ عَبْدِ الْعَزِيزِ شَاهِ
الْحَاجِ. اللَّهُمَّ أَدِمِ الْعَوْنَ وَالْهِدَايَةَ وَالتَّوْفِيقَ، وَالصِّحَّةَ
وَالسَّلَامَةَ مِنْكَ، لَوْلِيِّ عَهْدِ سَلَاطُور، تَغْكُو أَمِيرِ شَاهِ ابْنِ
السُّلْطَانَ شَرَفُ الدِّينِ اَدْرِيسِ شَاهِ الْحَاجِ، فِي أَمْنٍ وَصَلَاحٍ
وَعَافِيَةٍ بِمَنْنِكَ وَكَرَمِكَ يَا ذَا الْجَلَالِ وَالْإِكْرَامِ. اللَّهُمَّ أَطْلُ
عُمْرَهُمَا مُصْلِحَيْنِ لِلْمَوْظَفَيْنِ وَالرَّعِيَّةِ وَالْبِلَادِ، وَبَلِّغْ
مَقَاصِدَهُمَا لِطَرِيقِ الْهُدَى وَالرَّشَادِ.

Ya Allah! Jadikanlah kami antara hamba-Mu yang menjaga amanah. Peliharalah negeri dan negara kami daripada kehancuran disebabkan perbuatan maksiat, rasuah, penyelewengan dan salah guna kuasa. Kurniakanlah kepada kami pemimpin yang amanah, jujur dan tegas dalam menegakkan kebenaran dan melaksanakan keadilan berlandaskan syariat.

Jadikanlah Ya Allah masjid dan surau di Negeri Selangor rumah-rumah-Mu yang aman, mempersatukan dan menjadi nadi kekuatan ummah.

Ya Allah! Lindungilah umat Islam dan Masjid Al-Aqsa di Palestin. Peliharalah mereka daripada kezaliman dan kejahatan, serta kurniakanlah mereka ketabahan, kekuatan, dan kemenangan.

Ya Allah! kukuhkanlah akidah umat Islam di negeri ini, berteraskan ajaran Ahli Sunnah Wal Jamaah yang berada di atas jalan Nabi Muhammad SAW dan para sahabat *Radiallahuanhum* serta jauhkanlah kami daripada segala fitnah yang boleh menggugat kesatuan dan perpaduan umat Islam.

رَبَّنَا هَبْ لَنَا مِنْ أَزْوَاجِنَا وَذُرِّيَّتِنَا قُرَّةَ أَعْيُنٍ وَاجْعَلْنَا لِلْمُتَّقِينَ إِمَامًا.⁴

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.⁵
عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَى وَيَنْهَى عَنِ
الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ.⁶

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُوهُ عَلَى نِعَمِهِ يَزِدْكُمْ،
وَاسْأَلُوهُ مِنْ فَضْلِهِ يُعْطِيكُمْ وَلَذِكْرُ اللَّهِ أَكْبَرُ وَاللَّهُ يَعْلَمُ مَا
تَصْنَعُونَ.

⁴ Al-Furqan: 74.

⁵ Al-Baqarah: 201.

⁶ Al-Nahl: 90.